


幸曾盛典




		九二七	漢書門
一	二	七	
二	二	七	
冊架	函號	類	

庫文閣內			
三九五	九二七	漢書	
二	二	七	
架冊	號類		

內閣文庫		
番號	漢	9217
冊數	12	(4)
函號	295	27

四



幸魯盛典卷十二

聖駕發曲阜晚

駐蹕於兗州府之西關

論大學士明珠曰周公古大聖人制禮作樂垂示萬世

今廟在曲阜應行致祭此係重大典禮爾衙門會同



禮部翰林院詳議來奏各該衙門議得道統之傳上

自堯舜逮於周孔我

皇上備堯舜之德明周孔之道

躬祀闕里復

命致祭周公廟庭禮儀隆盛洵為萬世章程應令該衙



三會盛典 卷一 二
門卽撰祭文遣官致祭

上日致祭周公禮宜隆重其遣恭親王長寧及禮部尚書介山偕往以見朕尊崇先聖之意

十九日庚辰

駕至汶上縣

駐蹕李家庄是日

命和碩恭親王長寧禮部尚書介山往曲阜周公廟致祭

御製祭元聖周公文

文載第一卷

附錄○孔廟東北三里許有周公廟蓋魯太廟故

基○宋真宗大中祥符二年十月勅中書門下曰方嶽盛儀克脩於封諡古先茂烈允尚於追甄周公昔在宗周蔚爲上聖營鼎邑之宅王制建中秘金滕之書忠規蓋世誥東征而法正輔南面以道尊創禮樂之懿文配日月之久照姬誦所倚宣尼式瞻煥乎舊章垂之千載今以詳求古典昭報元休陟降告成撫巡問俗弭節岱宗之域鳴鑾少皞之墟逖覽遺風緬懷前哲始公胙土實惟是邦故其嗣君得用王祭而祠宇未構闕孰甚焉特議褒崇以申旌顯盛德不泯載欽可久之賢列爵有加

爰晉通王之號式宣殊禮永耀鴻徽可追封爲文
憲王於曲阜縣建廟春秋委本縣致祭

臣按周公以元聖成文武之德易象之演上繼義
文官禮之垂範圍萬世治統集三王之盛道統開
尼山之先其廟而祀之宜也唐顯慶以前與夫子
竝祀學宮開元以後別祀配享武王而追封建廟
則自宋之大中祥符始相傳其地卽魯之太廟以
地勢度之理或然也歲久傾圮祀事漸缺祿薦僅
屬其雲仍俎豆幾委於草莽歷有歲年罔或計及
皇上深宮宵旰勵精政治與兼三施四仰思坐待之勤

有默契潛通焉者過少皞之墟攬大庭之庫瞻言

啓宇眷念碩膚

特命親王精意致享

宸章雲爛輝映几筵樂備禮隆度越前軌數千年廢墜
之典一旦得

聖天子修舉之豈非亘古未有之盛事哉

康熙二十四年乙丑二月

命以周公後東野沛然爲世襲五經博士

禮部

題爲額

恩求錄乞

賜襲封以培聖脈以補缺典事據周公七十三代嫡孫

奉祀生員東野沛然

奏前事奉

旨交與吏部欽此該_臣等議得據周公嫡孫奉祀生員

東野沛然

奏稱切惟堯舜禹湯文武之道傳之周公自周公而

傳之孔子至於顏曾孟仲得聖道之傳皆有世襲

博士以優其後宋儒程朱有表章聖道之功子孫

亦得以博士世其官_臣祖周公以元聖之德制作

經緯固與孔子竝列久矣而今祠宇頽壞拜謁寂

寥主鬯僅一青衿祭田不及百畝不惟不能竝尊

於孔子而且不得比備於顏曾孟仲之班倘蒙

垂念周公傳道之功斟酌於顏曾孟仲之間稍加優

隆等語查得會典內開載周公於歷代帝王廟配

享凡係配享前代帝王功臣後裔竝無承襲博士

之例且查東野沛然所

奏東野誌內至東野沛然已經七十三代以上歷代

竝無議有承襲之處相應將東野沛然

奏請照顏子等先賢承襲之處無庸議奉

旨周公承接道統繼往開來功德昭著其子孫應否給與職銜著九卿詹事科道會同確議具奏

禮部等衙門

題前事臣等議得仰惟

皇上

道兼君師

德隆今古媿唐虞之勲業接周孔之心傳治定功成禮明樂備創垂無前之盛烈肇舉未有之隆規周公兼三王而施四事承武烈而顯文謨其後裔古來雖無給有官職恭遇我

皇上崇文重道之時周公後裔應授官職撥給祀田修葺廟宇以彰

皇上之殊恩曠典俟

命下之日行文該撫詳查周公嫡派取具各結併東野氏宗譜送到之日禮部查明將應授之人

題請授爲世襲五經博士祀田照顏子祀田例由戶部撥給廟宇交與該撫設法修理可也奉

旨依議

附錄○漢東野環撰東野氏世系曰昔吾先祖后稷姬姓諱棄始封於邰后稷生不窋失其官守不

宓生鞠陶鞠陶生公劉克脩先業往遷於豳公劉
生慶節慶節生皇僕皇僕生差弗差弗生毀隃毀
隃生公非公非生高圉高圉生亞圉亞圉生公叔
祖類公叔祖類生太王徙都於岐太王生王季王
季生文王作邑於豐文王生周公受封於魯周公
生伯禽襲封至國伯禽生魚受東野田一成以自
養魚生宗世居東野因以爲姓宗傳至質計一十
八世矣時當戰國遭楚滅魯幸而天意不絕惟質
得存以免禍自竄東吳至秦末而還魯於是懼其
綿遠失其真傳特命環考訂譜牒編爲世系俾本

宗支庶秩然不紊爲後世子孫者奚可不知所重
耶

臣按東野環所撰東野譜序推本周家始封迄於
文武周公世次秩然又誌載祥符間真宗適魯祀
孔子以東野氏數世同居詔旌其門閭方是時帝
勅中書門下追封周公爲文憲王令曲阜建廟祀
之仍令有司備儀禮擇日冊命若東野氏得以公
裔沾一命備祠官恩至便也而竟絕不聞豈非前
代之缺畧耶我

皇上幸魯親祀

先師而東野以三千年後之餘裔得以邀纂組之榮
循世祿之例

恩出非常典斯鉅矣

康熙二十四年乙丑八月

詔增廣孔林地一十一頃有奇免其稅糧

衍聖公臣孔毓圻

奏為遵

旨奏明增擴林地事臣祖賜塋在曲阜縣城北即古魯
城北泗上也子孫例得祔葬林內臣查孔林原額
地一十八頃俱係歷朝賜地相沿至今狹隘殊甚

恭遇

皇上鑾輿親臨林內俯軫情形臣面奉
恩旨准

賜增擴仰見我

皇上優卹聖林澤及綿遠臣闔族人等世世銜感但林
以外除南一面近城無可增廓其東西北三面為
地不等有臣祭田在內者亦有臣自置之地現在
行糧者亦有民間之地參錯在內者除臣地自應
併入林內其民間之地恭候

皇上俞旨允行臣願自備價值會同地方有司酌照時

價交易置買俟陸續置買之後容_臣彙齊造冊及所擴林地一併

奏請

欽賜豁糧可也奉

旨該部議奏

戶部

題前事該_臣等查得衍聖公孔毓圻疏稱等因前來查

先師孔林地一十八頃亦為不少但孔毓圻面奉

恩旨准

賜增擴相應行令該撫將孔林之地一面增擴幾丈

此增擴內有民地若干之處確議具題到日再議

可也奉

旨依議

戶部

題前事該_臣等議得該撫張鵬疏稱孔林東西北三

面酌量增擴地一百五十五丈七尺共一十一頃

一十四畝九分零內除孔毓圻自置地一頃一十

畝零不議價外孔氏並百姓地一十頃四畝零每

畝價銀二兩一錢五分共價銀二千一百五十八

兩八錢零孔毓圻自照數給價至於應徵銀米每年共該徵銀二十四兩五錢零共該徵米二石五斗零相應聲明聽候部議等因前來查增擴林地一案既經該撫酌量增地一十一頃一十四畝零俱係孔毓圻給價置買無容議每年應徵銀二十四兩零米二石五斗零相應豁除可也奉

旨依議

附錄○明洪武間衍聖公孔希學增廣林田記曰曲阜祖林鬱然在魯城龍門北繚以周垣代禁樵採蓋將二千年於茲矣嗣續繁衍祔葬纍纍而東

西形勢漸狹方議規斥以廣其地邑人居文約等聞其有是舉僉言曰凡吾徒日用之間父父子子夫夫婦婦懽然有恩粲然有文而能弗畔道者寧可不知其所自耶願以各家世業廣袤若干畝永爲來雲甫竈之所核其地五十大畝入林內○永樂間孔諤創建林圍牆記曰祖林一區周迨居民烟爨千家樵青採綠薪乾榘腐日不絕蹟雖申之以禁戒然難於防虞曲阜世尹孔克中捐已貲萬緡傳集耆老乘此農隙創建圍牆以孟冬朔旦起工至其日邑之父老各率子弟千餘人悉荷版鋪

聖公亦以廟丁百餘人來會日不彌旬千堵皆興於是檢族屬驗佃力復得堅薪千餘車併工聚力刻日以完○崇禎間衍聖公孔胤植重修林垣碑記曰塋自春秋以至於今幾歷三千之歲族屬蕃暢林垣浩大歲月經久不無頽廢思更新之而獨力難肩此任賴諸宗人共襄其事陶瓦甃勤垣墉一時百堵俱興煥然新矣

臣按宋鴻臚卿孔宗翰狀云夫子墳林今一千六百餘年子孫皆葬其間周圍十餘里可見宋時規制已大但歷朝增廣與孔氏子孫所自恢擴者家

乘畧而不書以至於今狹隘滋甚自非我

皇上親幸俯軫情形

特頒渙號而欲式廓往古之封上損

國稅下易民田不亦難乎前代加意林廟輒增置守戶命有司禁樵牧以時修飭而止若其中廣狹從未有過而問者

皇上敦崇

先聖而念及其子孫

澤逮於泉壤衍聖公臣孔毓圻猶逡巡未敢陳乞而皇上親發德音准其增擴蠲其常賦所廣地一十一頃

有奇較之於舊又十之六七矣蓋三千年以來未逢此

曠典七十世以上未沐此

殊恩雖滄溟峻極無以喻其崇深圓象方儀難以形其高厚者矣

山東巡撫張鵬疏請停止開濬渠河

詔從之

山東巡撫張鵬

題爲欽奉

上諭事據布政司呈稱蒙撫院張案驗康熙二十三年

十一月十八日

上親祭

至聖先師孔子行禮畢該衍聖公孔毓圻等奏稱聖

廟前有橋池中無水曲阜城外有泉可以開通引

入城內廟前池中奉

諭准其開濬入城交與該撫遵行欽此等因到院案行

到司蒙此久經檄行曲阜縣欽遵開通去後又蒙

撫院案驗康熙二十五年五月初四日准衍聖公

咨據曲阜縣世職知縣孔尚愉呈詳前事詳稱據

闔縣紳耆老孔衍靖孔衍標等呈爲開河工大

難就民房拆毀宜籌懇申酌奪以重地方以祈善後事呈稱恭照

聖廟渠河引泉灌注奉有

成命欽遵在案現延堪輿踏勘形勢雖稱風水無礙方
向但按水道由城外文獻泉開濬入城以注廟河
復由廟西出水以滙入沂河開濬數里之遙城內
居民房屋當其衝者勢必拆毀且城當高阜泉在
下窪激使上流大費工力而尤可慮者一當霖雨
連綿山水暴漲之際泉流橫溢入城勢所必至則
目前既有蕩析之苦日後能無泛濫之虞地勢民

居俱有未便伏乞俯順輿情轉申撫院爲民請命
則地方有善後之圖而民生戴安全之德矣據此
該曲阜縣世職知縣孔尚倫看得櫺星門內渠河
向來乾涸於康熙二十三年

聖駕臨幸闕里釋奠

先師

駐蹕渠旁衍聖公孔毓圻等擬欲媲美園橋泮水之隆
因有導泉入河之對荷蒙

俞旨允行實爲萬世光榮宮牆曠典卑職履任以後疊
奉檄催日在相度形勢酌議興工今據紳衿耆老

等具呈前來職復核水源自城東文獻泉入城自
城入廟河自河又西流以匯於沂開鑿數里之遙
雖據堪輿元氏縣生員平章等謂無礙方向但民
居稠密關廂廬舍當由衝掘者不下數百餘家一
旦盡令拆毀老幼失所棲止無地情實可矜且城
在高阜泉在下窪引之上流大費工力使當霖雨
水漲勢必橫溢入城誠爲可慮事關城社民生卑
職身任地方之責鑒此輿情敢不懇懇過計隨於
本月具詳各憲去後蒙撫院批據詳有礙民舍仰
卽就近會商妥確詳報繳又蒙布政司批仰候移

明衍聖公咨覆到日轉詳撫院批奪繳各等因批
行到職蒙此合具詳本府裁酌轉咨等情到府據
此查得此案於康熙二十三年十一月內恭遇

聖駕臨幸闕里釋奠

先師

駐蹕渠邊親承

天語垂問渠水因而啓

奏開濬城外文獻泉可以入渠奉

旨准行欽遵在案本府踴躍從事延請堪輿相度形勢
至再至三務求有裨祖廟無害地方庶爲不負

聖恩而形家議論不一所以斟酌踏勘多費時日今擬引城外文獻泉由東而入另鑿水門一座開濬入城迤西而行引入渠內又自渠內西流出水以歸注沂河無礙方向業經檄行該縣報明院司今該縣據闔邑紳衿耆老人等具呈稱目前有礙民房久後恐慮水患等情本府又延老成堪輿復勘形勢城內街道窄狹而民居稠密當水道之衝房屋必須拆毀且開濬水道延袤數里虧額之地稅無從辦納民間之車轂難以行走此闔邑人民所以有切膚之顛也至稱當霖雨連綿之際水勢暴漲

惟恐橫溢入城此雖該縣過慮及此但爲地方城社起見自應詳慎本府旣經覆核伏念

聖天子堯舜在上重道與愛民之心時厯

聖念中爲臣子者敢不仰體但因有礙地方而請停開

濬本府卽有負

聖恩若果毀拆民房諸所不便不爲酌議萬全又非仰

體

皇上堯舜之心以爲心也擬合移咨等因到院案行到司該本司布政使黃元驥查看得曲阜縣開濬文獻泉水導之入城引注聖廟池中原係衍聖公奏

准已奉有

俞旨欽遵在案本司日事督催聿觀厥成今蒙院准行
聖公咨據闔邑紳衿耆老之呈請停開濬既經行
聖公覆核以

聖天子重道與愛民之心無二今據咨有拆毀民房後
來靈雨水溢不無意外之虞酌議萬全仰體

皇上愛民之心不欲以私廢公斟酌於利害輕重之中
請停前來皆為地方城社永遠所關似應允行
題請以聽部覆遵行者也等因呈詳到臣該臣看得
曲阜縣城外泉水開通入城一案原係衍聖公孔

毓圻奏奉

上諭允行到

臣臣

隨檄布政司遵行去後今據布政使

黃元驥詳稱衍聖公移據闔邑紳衿耆老人等公
呈僉稱若開引文獻泉水由城外入城以注廟河
復由廟西出沂經過城內街道窄狹居民稠密當
水道之衝房屋必須拆毀且城外延袤數里有虧
額內民地稅無從辦更慮往來車轂難以行走且
城高泉下大費工力尤慮靈雨水漲橫溢入城有
關城社民生經衍聖公咨臣覆核仰體

皇上愛民之心不敢以私廢公請停開濬既據布政司

呈詳前來理合具題伏乞

皇上睿鑒

勅部議覆施行奉

旨該部議奏

工部

題前事查該撫既稱闔邑紳衿耆老人等俱稱若開

泉水必致房屋拆毀有虧民地車轂難行衍聖公

孔毓圻亦仰體

皇上愛民之心不欲以私廢公請停開濬等語應如所

題可也奉

旨依議

臣按辟靡泮宮皆取諸水以為名者也圓則為辟

半之為泮以止觀聽者於水南非僅溝而環之也

班固之詩曰乃流辟雍辟雍湯湯聖皇蒞止造舟

為梁辟雍得有舟梁蓋非一勺而已金宣宗於洛

立宣尼廟尚書省委襲封衍聖公董其役未幾告

成命導蔡水以圍其廟其取於水之有源審矣闕

里之南溪為魯泮宮故址亦可舟可梁水落之際

未之竭也我

皇上駐蹕橋門從容諮訪有考於古辟泮之制業奉

俞旨許鑿文獻之泉以通廟渠矣廼魯城形勢連岡紆
 迴故名曲阜城高泉下難於疏導郭外四山環匝
 水潦灌河奔泉引之入城爲慮不細所勘開濬之
 路應毀居人廬舍不下數十百家
 皇上重地方卽所以重林廟崇
 聖道正所以衛民生
 俯察情形卽回
 成命於茲益見
 聖聽之轉圜
 睿謨之周至焉

幸魯盛典卷十二終

幸魯盛典卷十三

康熙二十四年乙丑二月

詔以

御書萬世師表扁額摹揚頒天下

文廟

康熙二十四年正月左副都御史張可前

題為

聖德遠邁千古

睿謨宜昭億祀請

勅編輯成書以丕示遐邇式訓臣民事竊惟古帝王建

非常之功德者必備非常之法守用以啓迪海內

臣民俾遵循於至善也臣伏見

皇上盛德巍巍參天兩地事

郊

廟則致敬奉

兩宮則盡孝蠲租省刑之

詔屢下

經筵講學之勤弗輟

神謀獨運

文武遐昭猶復宵衣旰食安不忘危諮諏民隱肅清吏

治

却登封而罔舉

讓尊號以弗居

鳳輦東巡閭閻被德

恩加前代之園陵

澤逮先師之苗裔乃至一動一言無不仰企天心俯協

輿望固已光輝史冊美不勝書然非彙輯成編頒

布海內則率土臣民有身被生成而未能仰體制

作之精意者矣臣謹按明太祖洪武七年日歷告

成承旨詹同侍講學士宋濂請將當日聖政輯成

一書分爲四十類名曰寶訓傳示天下夫明祖以武功開國其所行政事猶且允臣下之請編爲寶訓况我

皇上合創守而同揆裕文武而兼濟超越明祖萬萬哉
今

起居注諸臣雖已詳記

聖績而金匱石室之藏人間無由窺測卽近者奉

詔纂修方畧然止載伐叛之武功而未紀歷年之仁德

臣竊謂宜

勅內閣翰林院諸臣備輯

皇上御極以來

睿謨聖政彙成一書分條編類如宋濂等所集寶訓例

刊布寰宇一以迪四海之臣民一以垂億祀之法

守煌煌乎竝二典三謨而焜耀於覆載間矣抑臣

更有所請者

駕幸闕里

御書萬世師表四字懸額孔廟曠典盛事振古所無竝

請

勅部勒石徧頒各省懸之學宮不獨尊師重道之盛德

昭示士類更見

龍飛鳳翥之寶篆光垂寰區也奉

旨朕御極以來孜孜圖治勤政愛民日理萬幾常懷兢

業雖海宇底定漸致昇平但風俗人心未臻上理這

所請將歷年政事彙集成書是否可行內閣翰林院

會議具奏

內閣等衙門

題前事臣等伏惟

皇上

德隆廣運

化洽時雍言與道俱動與法合自

御極以來敬

天法

祖勤政愛民極

兩宮孝養之隆著

萬幾明作之實

典學是懋以法古聖賢為心

巡省時勤以問民疾苦為事用致百僚慎憲九有承

風三方梗化之臣仗

淵謨而獻馘跨海逋誅之寇服

駿畧而輸誠

道冠百王

功被六合誠宜

俯從所請彙輯歷年政事編纂刊布以慰中外臣民

想望之忱

臣

等伏查明洪武時日曆告成命詞臣

編輯寶訓一書隨命禮部刊刻頒布凡以修明典

法垂示子孫意至深遠也我

皇上神功聖烈遠超前代無一念不切於蒼黎無一事

不原於墳典

緝熙懋學懿爍鴻猷傳之天下爲丕顯之

聖謨垂之萬世卽不刊之法鑑允宜特啓纂修之局勒

成

聖代之書昭宣海宇頒示臣民者也一切應行事宜伏

祈

勅下該部詳查典例具覆舉行至於

駕幸闕里

御書萬世師表題額

聖教自此益光儒風於焉丕振

龍章鳳藻光騰泗水之濱

鐵畫銀鈎彩耀尼山之上一時風聲之所樹四海觀

感之所生宜徧揭於黌宮使士子咸知瞻仰相應

亦如所請

勅部勒石頒給直隸各省府州縣儒學懸置扁額可也
奉

旨九卿詹事科道會議具奏

禮部等衙門

題前事臣等伏惟

皇上御極以來

勞心敷治

銳意圖安仰體

上天仁愛之心俯答下民救寧之望孝養

兩宮愛育兆姓此誠治超三代法垂萬年者也邇來遐方

向化薄海來同

問俗觀風

崇師重道中外瞻依臣民踴躍應照內閣等衙門所

議將歷年政事彙輯成書宣布中外并將

御書萬世師表之字勒石頒給直隸各省府州縣儒學

懸置扁額俟

命下之日將纂修開館及應行事宜該部詳查典禮具

奏可也奉

旨依議

禮部

題前事_臣等議得歷年政事彙輯成書所派監修總裁副總裁官纂修收掌謄錄官員書辦等役彙輯事宜及開館之所俱聽內閣翰林院議覆開館吉期_臣部由欽天監選擇開館所有監修等官員相應照監修

聖訓官員筵宴之例

遣內大臣一員主席在_臣部筵宴一次桌飯銀兩內閣具

題到部移咨該部照例支給其每月公用錢糧應行

停止所

遣內大臣一員之處應交與領侍衛內大臣彙輯告竣進呈之日再為刊刻印刷宣布中外其

御書萬世師表之字應

勅下該撫在闕里勒石印刷送至_臣部頒發各直省巡撫轉行各府州縣學宮懸置扁額可也奉

旨依議

衍聖公_臣孔毓圻

題為

宸翰同天摹搨恭進仰祈

睿覽事康熙二十三年十一月十八日恭遇
皇上臨幸闕里釋奠

先師

御筆親題萬世師表四字扁額臣謹製扁涓吉躬捧懸

設大成殿正中率領族屬恭設香案望

闕叩頭謝

恩訖一面選工礮石摹搨臣於恭進摹石

御書

聖製一疏內已經

題明今臣旋里親督工人摹刻萬世師表四字告成

謹裝裱卷軸恭進

睿覽臣仰瞻

皇上御筆字畫端勁戈法渾成

挫萬象於毫端含位育中和而立極

調元化於行墨觀日星河漢以爲文

光彩肆映而莫測其端

結撰天然而莫窺其蹟以頒天下則合臣民嚮往如

親雲日以觀摩以設廟庭當與泰岱

宸章同亘乾坤而永奠

體製卓越大矣至矣此豈臨摹之所能彷彿臣卽親

督鐫勒猶恐失真恭進之際實滋惶懼仰祈
皇上鑒宥奉

旨該部知道摹搨留覽

臣按史臣之贊舜曰帝乃誕敷文德其贊禹曰文
命敷於四海聖王致治未有不以文先天下者也
我

皇上典學右文遜志時敏日就月將

聖躬率先寓內共遵文教茲

允廷臣請以

御書萬世師表扁額懸置天下學宮使遐陬僻壤之民

無不曉然於

天子崇師重道如此而仰法我

皇上則古稱先之

聖心以共臻一道同風之雅化洵乎得振興文治之本

焉昔明太祖讀漢書謂侍臣宋濂孔克仁曰漢治

何以不比隆三代孔克仁對曰以其雜霸耳明太

祖曰然高祖創業未遑禮樂孝文時當制作復三

代之舊乃逡巡未遑使漢治終於如是三代有其

時而能爲之者也漢文有其時而弗爲者也然明

太祖雖爲斯言乃洪武之治絜諸三代以上猶有

不醇不備之憾豈若我

皇上緬考百王之迹深明致治之原凡所建立創制無

不損益質文盡美盡善可為萬世法程建

皇極之師表文德之敷文命之被曷以過此臣閱邸抄

讀諸省撫臣建置懸額之疏天下蒸蒸然嚮風矣

康熙二十五年丙寅正月

上親於西山選

孔子廟碑材特發內帑鳩工採運二月碑成運至通

州水次

命內務府廣儲司員外郎阜保工部都水司員外郎卞

永式運送

御碑於闕里

特賜衍聖公孔毓圻廣儲司庫銀六百五十兩為運碑

旱船之費

上諭阜保曰

聖廟碑事關大典以爾任事謹慎特遣爾去務期敬

慎運至濟寧暫置在彼爾可回都俟冬天地凍再往

以旱船運至曲阜

先是御史任珙

題為闕里既蒙

臨幸萬國咸仰文明特請

御製碑記改正墓號以光典冊以垂不朽事恭惟我

皇上神明天縱文德武功直紹唐虞三代茲當普天率

土文教覃敷之日猶深已治已安一夫未獲之慮

邇者

車駕東巡惟一以洞悉民隱爲念因思二帝三王治

民之道至孔子而益彰乃於尼山毓粹之區

特行尊師重道之禮入廟而

躬親九拜儀旣備矣當祀而

寵頒御繖禮更渥焉此雖一時異數實係萬世同風蓋

自漢唐以來臨幸闕里之盛未有隆於今日者也

臣考宋真宗祥符元年臨幸闕里具有碑記垂諸

闕里誌書况我

皇上道合勲華心傳洙泗旣蒙

御書扁額

賜懸廟庭必賴

宸翰製碑光垂萬代

臣懇

皇上撰立碑記勒之貞珉庶鉅典與日星同耀而

睿藻竝雲漢爲昭矣抑

臣

更有請者孔子稱號自唐開元時追謚爲文宣王宋真宗加至聖文宣王元武

宗加大成至聖文宣王推崇不爲不隆但文宣僅一節之謚法而大成亦借樂之偶稱且孔子以尼山一布衣爲萬世帝王師原以德不以位似非僅爵位所能揚扆也明嘉靖九年釐正祀典定爲至聖先師孔子誠名正言順萬世不可易之論矣我國朝定鼎以來自國學及天下郡縣州衛儒學所設孔子牌位皆稱至聖先師孔子亦以斟酌既定可無容損益於其間也乃牌位皆稱至聖先師孔子而孔林墓前所立之石猶稱文宣王墓豈所以妥神靈昭畫一乎今

皇上親臨聖林隆禮旣出於創舉名號實賴以

欽定臣請

勅諭將文宣王墓改正爲至聖先師孔子墓竝請於聖製碑記中詳載改正緣由則萬代瞻仰益與天地同其無疆矣奉

旨該部議奏

禮部

題前事臣等議臺臣任珣疏內稱

皇上神明天縱文德武功直紹唐虞三代普天率土文教覃敷邇者

車駕東巡洞悉民隱

特行尊師重道之禮

寵頒御繖自漢唐以來臨幸闕里之盛未有隆於今日

者也既蒙

御書扁額

賜懸廟庭必賴

宸翰之碑光垂萬代臣懇

皇上撰立碑記勒之貞珉等語欽惟

皇上

睿藻煥於日星

宸翰燦若雲漢新經

臨幸闕里

恩禮咸隆允宜勒諸貞珉以垂永久俟

命下之日將碑文交與翰林院撰擬碑文撰出之日交

與該撫刊勒建立又疏稱牌位皆稱至聖先師孔

子而孔林墓前所立之碑猶稱文宣王墓

皇上鑾輿親臨聖林隆禮既出於創舉請

勅諭將文宣王墓改爲至聖先師孔子墓竝請於

聖製碑記中詳載改正緣由等語查孔林墓前文宣王

碑係從來所有且改文宣王爲至聖先師以來竝

無改立墓碑之處應無容議奉

旨孔子聖集大成道隆德備參兩天地卓冠古今歷代帝王咸所師法朕研精經籍志切欽崇應勒廟碑朕俱親行撰文書寫以昭景行尊奉至意餘依議

工部會同內務府衍聖公

題爲請

旨事該_臣等會議得先經衍聖公_臣孔毓圻議此碑以我力量運送恐有疎虞惟過閘時令地方官同看協助過去可到濟寧從濟寧運至曲阜恐力不能運送等語到冬十月內內務府工部差官支取廣

儲司銀兩節省錢糧修造旱船運至曲阜縣等因議奏奉

旨會同衍聖公議奏欽此欽遵伏念

皇上尊崇

先師

御製碑文

親灑宸翰重道右文自古以來未有之盛典也其沿途運送碑石恐勞民力給發

內帑僱夫運送應於過閘之處行文直隸山東巡撫行令所屬閘口官員同看協助過去其從濟寧州

至曲阜縣百里有餘此運送脚價修造旱船搭橋
修路共銀六百五十兩於廣儲司支取給發行聖
公孔毓圻運去可也康熙二十五年三月三十日
題於四月初四日奉
旨依議著差工部內務府官各一員前往敬慎運送

四月庚午

御碑自通州發遵運河而南直隸巡撫于成龍令所過
之處協助牽挽山東巡撫張鵬令濟寧以北沿河
州縣有司詣河干協運閏四月二十一日乙巳衍
聖公孔毓圻率僚屬迎

御碑於張秋越三日丁未

御碑至於濟寧

欽使員外郎阜保卞永式同衍聖公孔毓圻及濟寧道
董安國兗州知府祖允圖濟寧州州同張仲達相
度置碑之所於濟寧城南五月丙申碑登於陸構
廠護之使人司巡徼焉是月

欽使馳還復

命衍聖公孔毓圻既領

內帑以備冬運乃令輪人度碑制爲負重之車四乘
所謂旱船也車旣成乃除道成梁方軌廣涂咸俾

如砥十一月

欽使復至衍聖公孔毓圻率纂修官金居敬俞兆曾叢克敬孫致彌葉湜沙汝洛章緯曹晃博士孔毓埏等馳迎濟寧州試演車牛覆視道路用戒儲備無有不供以候起運十二月朔辛亥大雪地凍始發碑藉茅束紵衍聖公孔毓圻乃偕員外郎阜保卞永式總督河道靳輔濟寧道董安國及地方各官親督人役升碑於車碑身長一丈八尺廣六尺五寸厚一尺七寸重七萬觔有奇聯二乘以載鼃廩長一丈一尺五寸廣於碑三寸重四萬觔有奇亦

載以兩車水盤石二各重萬觔有奇別載二車碑身凡用牛二百五十頭鼃廩半之水盤石又半之辰而駕及午而稅午而駕及酉而稅一牛一圍五圍一僕建旆於前執綏於後防閑左右鳴金以節之前驅具脂秣繕屨餼糧共用人六百餘牛五百餘皆傭之民間而酬其直凡運十有五日二十日庚午

御碑至曲阜衍聖公孔毓圻率纂修諸臣及族屬官生具朝服張樂叩迎於南郊遂導以入安置於廟庭孔子六十七代孫太子少師襲封衍聖公臣孔毓

圻

奏為恭謝

天恩事伏蒙

皇上頒賜

至聖廟碑石

命內務府員外郎

臣

阜保工部員外郎

臣

卞永式賁運

臣遵將

內庫發給銀兩奉

旨內事理先期備造早船搭橋修路於康熙二十五年

十二月初一日自濟寧州起送

欽差與

臣

同隨碑後敬慎督理安車徐行不煩民間一

夫一役於本月二十日抵闕里城南

臣

遂率領纂

修諸臣及闔屬官員紳衿

臣

族人等張樂建旗郊

外跪迎請入

臣

祖

聖廟是日也雲開雪霽日暖風和觀者遮道歡聲徹

天無異曩者我

皇上駕幸闕里時此固

欽差調度之宜實皆

皇上尊師重道之誠有以格

天心洽輿情也

臣

敬慎安置穩妥卽於詩禮堂前恭設香

案望

闕叩頭謝

恩訖因思

臣

祖廟內帝王碑記歷代不乏要不過近境

開山有司礮石從未有鑿貞珉於

神京發朱提於

內帑而煩皇華命使歷水陸閱寒暑如今日者也而

且碑石之聳萃敦龐甲衆碑以獨尊石理之精瑩

細潤較他石而增美真可竝犧象瑚璉用垂不朽

矣况行將灑

宸翰而煥

天章者乎

臣

當此

恩復加恩之代無以答我

聖不自聖之君惟有效

萬壽嵩山之呼祝一統磐石之奠而已爲此具本恭謝

奉

旨覽卿奏謝知道了該部知道

臣

按由濟寧至曲阜地僅百里而陸運之艱非三

冬嚴凍不能負重以致遠也故舟行則乘水盛碑

由通達濟宜於夏車行則恃冰堅碑由濟至阜利

於冬而以農隙休暇之月庀材斲輪以待臨事仰

見

聖心之律天時襲水土而恤人力卽一事也
睿思周至若此碑行順適入廟之日風日晴和霽雲五
色闔邑抃舞四方之人亦有重趼來觀者莫不懽
忻鳧藻稱希覲矣

二十七日丁丑員外郎阜保卞永式回京復

命并呈

聖廟圖請立碑之所

上命廷臣集議立碑於

聖廟大成門左發

內帑銀五百兩建造碑亭仍

命員外郎阜保卞永式監造

廣儲司員外郎阜保轉奏衍聖公孔毓圻奏稱臣

觀

聖祖廟內自古至今碑石雖多從未有壯麗堅緻如

御賜之碑者今蒙

皇上頒下

御筆山東亦無名手堪任摹勒求

皇上御前選擇良工發下鐫刻方稱

皇上非常之

恩典等語奉

旨公言甚是爾與內務府工部會同將鑿碑刻字蓋碑亭之人帶去之處會議具奏欽此欽遵該內務府工部會議應將刻字人并鑿碑蓋碑亭各人役令阜保帶往曲阜可也奉

旨依議

員外郎阜保又奏漢唐以來歷代帝王在

聖廟立碑甚多俱未按朝代次序今

皇上所立之碑應在何處以圖樣進

呈奉

旨立碑事宜重要有關典禮著內閣大學士翰林院掌

院學士禮部工部內務府會議面奏

工部等衙門

題為遵

旨會議事奉

旨立碑事宜重要有關典禮著內閣大學士翰林院掌

院學士禮部工部內務府會議面奏欽此該_臣等會

議得自古帝王褒崇

先聖或車駕臨幸釋奠或儒臣撰文立碑垂之簡編

已不多見我

皇上以勲華之上聖契洙泗之心傳

臨幸講堂瞻謁林廟

禮隆九拜事軼千秋

躬製碑文

親灑宸翰發金礮石

遣官董治此百王希覲之盛事史冊未有之隆規也茲

以立碑處所令_臣等酌議謹考前史實錄闕里志

諸書及廟堂圖繪歷代建碑惟擇寬適之地非有

前後次第今相度得大成門外左廂金聲門之右

高明爽塏可以建立碑亭昭垂來許伏候

命下遵行入宮牆者逾生嚴敬陟廟庭者益肅觀瞻請

動

內帑五百兩差內務府廣儲司員外郎阜保工部都

水司員外郎卞永式督修帶刻匠二名石匠四名

給驛前往悉如前議奉

旨依議

衍聖公_臣孔毓圻

題爲請

旨事_臣前閱邸抄禮部題覆臺_臣任珙疏奉

旨孔子聖集大成道隆德備參兩天地卓冠古今歷代

帝王咸所師法朕研精經籍志切欽崇應勒廟碑朕俱親行撰文書寫以昭景行尊奉至意餘依議欽此
欽遵今碑石已運至廟內則夫

頒降

御書

聖製以光寵廟庭者業有成

命無容微臣再請矣但

天章宸翰之重必得琢月鏤金之手方能摹勒山左僻陋實無其人而臣又軫見寡聞知識短少敢不預行

題請至於

御碑建立處必擇和會爽塏之地始足以煥日星而式觀仰此皆事出特典非微臣所敢擅專謹

題請

旨奉

旨已有旨了該部知道

康熙二十六年丁卯二月十二日庚戌廣儲司員外郎阜保率匠役至曲阜興工蓋造碑亭五月初六日癸亥完工阜保回京覆

旨

上以御書

聖廟碑文發出令阜保率刻字人往曲阜勒碑阜保請賚捧

御書儀注并請碑亭用琉璃瓦皆

命廷臣會議阜保等求列名碑陰

上許之又

命阜保於山東採周公孟子二廟石碑

員外郎阜保以五月十六日啓

奏

上諭曰爾來正好

聖廟碑適書就爾可先帶鐫字人往鐫刻朕於周公孟子廟亦欲立碑此二廟石碑爾可就近在山東採取俟採得碑石鑿成之時再來請碑文諭畢上將書就

孔廟碑文付阜保領出阜保又奏云臣觀

聖廟中自古帝王多有碑刻然如今日

皇上御製御書之碑乃從來所未有臣應作何請去請

定儀注又碑亭蓋完應用琉璃瓦山東竝無燒造之人一并請

旨奉

旨琉璃瓦著該部卽速燒造於回空糧船帶去其作何
請去之處著與內務府禮部工部會同議奏阜保又

奏云臣見漢唐以來

聖廟碑刻監造之臣俱得列名碑陰今臣等遭逢

聖世親見曠典真乃人臣罕有之奇遇臣等名字應否

亦附刻碑陰奉

旨爾等名字准刻於碑陰阜保奏曰

皇上御製御書昭垂萬古與天地同久小臣何幸附刻

姓名亦得隨

皇上御筆永遠不朽臣不勝感激謹奏謝

恩奉

旨是

工部等衙門

題為請

旨事本年四月二十二日廣儲司員外郎阜保將

孔子廟碑亭圖樣進呈

御覽口奏山東地方無燒造琉璃瓦之土亦無會燒之

人奉

旨琉璃瓦料從此帶去之處與工部會議欽此欽遵該

臣等會看

孔廟圖樣歷代建立碑亭俱用綠瓦建造碑文勅令
文臣撰擬今

皇上躬製碑文又

親灑宸翰勒諸貞珉爲萬世法寶合用黃瓦以崇

盛典相應照依建造碑亭官員所估數目此處速燒

黃色瓦料交與造碑亭官員可也奉

旨仍用綠琉璃瓦

工部等衙門遵

旨會議得康熙二十六年五月初三日廣儲司員外郎
阜保奏周公孔子孟子廟碑文

皇上御製文章

親灑宸翰關係重大一應頒行

御書儀制禮部應有定例合行請

旨奉

旨工部內務府會同議奏欽此欽遵該_臣等議查典禮

頒送

御書應用黃緞

御仗等執事

皇上御製周公孔子孟子碑文賚去應用儀仗照例迎
送奉

旨依議

幸魯盛典卷十三終

幸魯盛典卷十四

五月二十六日癸卯

命廣儲司員外郎阜保恭賚

御書

聖廟碑文設

御仗黃蓋鼓吹率鴻臚寺序班朱圭赴闕里鐫刻六月
初六日壬子衍聖公孔毓圻率纂修諸臣五經博
士孔毓埏及屬員師生人等兗州府知府祖允圖
率該屬有司奉迎於汶上縣二十二日戊辰

御書至於闕里於是山東巡撫錢瑋布政使黃元驥濟

東道陳俞侯提學道宮夢仁督糧道胡介祉充東道李煒鹽運使鮑復昌濟寧道董安國及各屬文武官員咸赴闕里瞻仰

御筆員外郎阜保令朱圭等卽摹

御書勒石

山東巡撫錢珏

題為恭報微臣出省日期等事臣惟前者

聖駕東巡

親詣闕里尊崇

至聖茲接邸抄奉

旨差廣儲司員外郎阜保贊捧

御製碑文馳到曲阜臣隨於康熙二十六年六月初二

日單騎減從前往曲阜瞻仰

龍翰至泉林周孟二廟造碑今臣亦親往督令如式置

造理合題報奉

旨該部知道

七月二十四日庚子

御碑告成廣儲司員外郎阜保恭贊摹搨樣本進呈

御覽二十八日甲辰工部筆帖式昂機圖運送綠琉璃

瓦一萬五千至於廟庭

衍聖公臣孔毓圻

奏爲恭謝

天恩事切蒙

皇上欽賜

聖廟碑石本年二月內工部等衙門會議得大成門外左廂金聲門之右高明爽塏可以建立碑亭動支

內帑五百兩差內務府廣儲司員外郎阜保工部都水司員外郎卞永式督修等因奉

旨依議欽此欽遵隨於二月二十八日礮石蓋亭一體

興工復蒙

皇上命內務府廣儲司員外郎阜保帶領鴻臚寺序班朱圭前來勒石於五月二十五日豎碑於七月初十日鐫完訖復蒙

皇上賜到綠琉璃瓦一萬五千於九月二十八日碑亭俱已完工仰惟

皇上

聖明天縱

學問性成觀風廣魯旣肇稱

親祀之儀

眷注尼山復重以

穹碑之錫鑿翠琰於恒嶽秀韞崑岡騰寶氣於端門
瑞符黃玉爰賁

龍章直探星宿竝揮

鳳藻上轆瓊霄

至言浩瀚弘道德之五千

妙楷端嚴本義疇之一畫發明綱常彝教若布帛菽粟
之竝陳昭示會極臣民化偏黨競絀而遵路千年

祠宇昭

聖撰而重光歷代文章待

宸篇而立極睠茲碑制之隆已逾前古邇者碑亭之建

復費

天心屢頒

內府金錢制其經費仍

勅皇華修建董以成功

特遣名手以臨摹法傳鐘鼎載

命尚方而燒造瓦致瑠璿跪誦

御書之搨適逢傑構之成重檐複栱輝於大成之門碧
發丹櫺坐鎮奎文之後遐邇咸觀曩今共仰考明
堂辟雍之制樹弘規於興聖之區卽鼓鐘彝鼎之

問敷

寶訓於觀摩之地一夫不役自仰體於
聖衷兩載經營顧猶煩乎

天使軼前王之制作炳煥千秋冠廟寢以巍峩垂休百
代謹以報成恭陳

奏

謝奉

旨覽卿奏謝知道了該部知道

附錄○唐高宗乾封元年贈孔子爲太師是年封
岱車駕幸闕里駐蹕謁先聖祠廟皇太子弘上表

乞樹碑以彰聖德曰臣聞周師東邁商閭延降軾
之榮漢蹕西旋彝門致抱關之想况泣麟曾躅歌
鳳遙芬被縟禮於昌辰飾殊榮於穹壤者伏惟陛
下資靈統極稟粹登樞乃聖乃神體陰陽而不宰
無爲無事均雨露之莫私六符薦而泰階平百寶
臻而天祚永靈臺所以偃伯延閣由其增絢尚齒
尊賢邁鴻名於萬古興亡繼絕騰峻軌於千齡大
矣哉茂實英聲固無得而稱矣日者封金岱畝會
玉梁陰路指沂川途經闕里回鑾駐蹕式鑑堯禹
之姿闢纘凝旒載想溫良之德於是特紆宸渙贈

以太師爰命重臣申其奠醑廟堂卑陋重遣修營
褒聖侯德倫子孫咸蠲賦役臣恩均扈從迹濫撫
軍舊烈遺塵躬陪瞻眺零壇相圃欣覲前聞又昔
歲承恩齒胄膠塾歷觀軒屏具列門徒想仁孝於
顏曾彌深景慕採風猷於竹帛冀啓顙蒙所以輕
敢陳聞庶加褒贈天慈下濟無隔異時咸登師保
式光泉夜敢以前恩重茲干請竊謂宣尼之廟重
闡規摹桂殿蘭羞永傳終古崇班峻禮式賁幽埏
而翠琰莫題言猷靡暢詢諸故實有所未周且將
聖自天惟幾應物拯人倫於已墜甄禮樂於旣傾

祖述勲華三千勵其瞻仰憲章文武億兆遵其藏
用豈可使汾川遺碣獨擅於無慚峴岫餘文孤標
於墮淚伏見前件孔廟營構畢功峻業增徽事資
刊勒敢希鴻澤令樹一碑但遼海清平久無徵發
山東豐稔時踰恒歲况鄒魯舊邦儒教所起刊勒
之費未足爲多許其子來不日便就乞特矜照遂
此愚誠臣識昧恒規言慚通理塵黷聽覽追增竦
戰勅旨依請。明太祖洪武元年二月遣祭酒孔
克堅致祭闕里勅諭曰仲尼之道廣大悠久與天
地相竝故後世有天下者莫不致敬盡禮修其禮

事朕今爲天下主期在明教化以行先聖之道今
旣釋奠於國學仍遣爾修祀事於闕里爾其敬之
○成祖永樂十五年九月御製孔子廟碑文曰道
原於天而昇於聖人聖人者繼天立極而統承乎
斯道者也若伏羲神農黃帝堯舜禹湯文武周公
歷聖相傳一道而已周公沒又五百餘年而生孔
子所以繼往聖開來學其功賢於堯舜故曰自生
民以來未有盛於孔子者也夫四時流行化生萬
物而高下散殊咸遂其性者天之道也孔子參天
地贊化育明王道正彝倫使君君臣臣父父子子

夫夫婦婦各得以盡其分與天道誠無間焉爾故
其徒曰夫子之不可及也猶天之不可階而升也
又曰仲尼日月也無得而踰焉在當時之論如此
亘萬世無敢有異辭焉於乎此孔子之道所以爲
盛也天下後世之蒙其澤者實與天地同其久遠
矣自孔子沒於今千八百餘年其間道之隆替與
時陟降遇大有爲之君克表章之則其政治有足
稱者若漢唐宋致治之君可見矣朕皇考太祖高
皇帝天命聖智爲天下君武功告成卽興文教大
明孔子之道自京師以達天下竝建廟學徧賜經

三傳全典 卷十四
籍作養士類儀文之備超乎往昔封孔氏子孫世襲衍聖公秩視一品世擇一人爲曲阜令立學官以教孔顏孟三氏子孫嘗幸太學釋奠孔子竭其嚴敬尊崇孔子之道未有如斯之盛者也朕纘承大統丕法成憲尚惟孔子之道皇考之所以表章之者若此其可忽乎乃曲阜闕里在焉道統之系實由於茲而廟宇歷久漸見墮敝弗稱瞻仰往命有司撤其舊而新之今年畢工宏邃壯觀庶稱朕敬仰之意俾凡觀於斯者有所興起致力於聖賢之學敦其本而去其末將見天下之士皆有可用

之材以贊輔太平悠久之治以震耀孔子之道朕於是有深望焉遂書勒碑樹之於廟并系以詩曰巍巍元聖古今之師垂世立言生民是資天將木鐸以教是畀謂欲無言示之者至惟天爲高惟道與參惟地爲厚惟德與含生民以來實曰未有出類拔萃難乎先後示則不遠日用攸趨敦敘有彝遵於聖模仰惟皇考聖道實崇禮樂治平身底厥功曰予祇述詎敢或懈聖緒丕承儀憲永賴巖巖泰山魯邦所瞻新廟奕奕飭祀有嚴鼓鐘喤喤磬戛擊八音相宣聖情怡懌作我士類世有才賢

三
卷一
八
佐我大明於萬斯年。○成化四年御製重修孔子廟碑曰朕惟孔子之道天下不可一日無焉何也有孔子之道則綱常正而倫理明萬物各得其所矣不然則異端橫起邪說紛作綱常何自而正倫理何自而明天下萬物又豈能各得其所哉是以生民之休戚係焉國家之治亂關焉有天下者誠不可一日無孔子之道也蓋孔子之道卽堯舜禹湯文武之道載於六經者是也孔子則從而明之以詔後世耳故曰天將以夫子爲木鐸使天不生孔子則堯舜禹湯文武之道後世何從而知之將

必昏昏冥冥無異於夢中所謂萬古如長夜也由
此觀之則天生孔子實所以爲天地立心爲生民
立命爲往聖繼絕學爲萬世開太平者也其功用
之大不但同乎天地而已噫盛矣哉誠生民以來
之所未有者宜乎弟子形容其聖不一而足至於
中庸一書而發明之無餘蘊矣自孔子以後有天
下者無慮十餘代其君雖有賢否智愚之不同孰
不賴孔子之道以爲治其尊崇之禮愈久而愈彰
愈遠而愈盛觀於漢魏以來褒贈加封可見矣迨
我祖宗益興學校隆祀典自京師以達於天下郡

邑無處無之而在闕里者尤加之意焉故太祖高皇帝登極之初卽遣官致祭爲文以著其盛而立碑焉太宗文皇帝重修廟宇而一新之亦爲文以紀其實而立碑焉朕嗣位之日躬詣太學釋奠孔子復因闕里之廟歲久漸敝而重修之至是畢工有司以聞深慰朕懷嗚呼孔子之道之在天下如布帛菽粟民生日用不可暫闕其深仁厚澤所以流被於天下後世者信無窮也爲生民之主者將何以報之哉故新其廟貌而尊崇之尊崇之者豈徒然哉冀其道之存焉爾使孔子之道常存而不

泯則綱常無不正倫理無不明而萬物亦無有不得其所者行將措斯世於雍熙太和之域而無異於唐虞三代之盛也久安長治之術端在於斯用是爲文勒石樹於廟庭以昭我朝崇儒重道之意焉系以詩曰天生孔子縱之爲聖生知安行仁義中正師道興起從游三千往聖是繼道統流傳六經旣明以詔後世三綱五常昭然不替道德高厚教化無窮人極斯立天地同功生民以來卓乎獨盛允集大成實天所命有天下者是尊是崇曰惟聖道曷敢弗宗顧予渺躬承此大業惟聖之謨於

心乃愜用之爲治以康兆民聖澤流被萬世聿新報典之隆尤在闕里廟宇巍巍於茲重美文諸貞石以光於前木鐸遺響餘千萬年。孝宗弘治十七年重建聖廟大學士李東陽疏請刻御製碑曰先該山東巡撫徐源奏闕里孔子廟修建落成續該禮部題請御製碑文及遣官祭告奉旨是遣李東陽祭告臣竊惟修建孔廟朝廷重事而御製碑文及遣祭祝文尤陛下隆師重道之盛心是宜刻之金石以昭示萬世但本廟僻在一方恐無善寫楷書之人不能揚勵宸章有辜恩典臣奉將使命

事體相關乞令制勅房中書舍人喬宗賁捧前項御製文字往彼書寫上石仍乞帶領工部文思院副使閻傑就彼鐫刻事畢之日卽令回京該部通行照例應付廩給脚力制曰可。孝宗御製碑文曰朕惟古之聖賢功德及天下後世立廟以祀者多矣然內而京師外而郡邑及其故鄉靡不有廟自天子至於郡邑長吏通得祀之而致其嚴且敬則惟孔子爲然蓋孔子天縱之聖生當周季聖賢道否之日而不得其位以行乃歷考上古以來聖人之君天下者曰堯曰舜曰禹湯文武已行之迹

并其至言要論定爲六經以垂法後世自是凡有天下之君遵之則治違之則否蓋有不能易者真萬世帝王之師也故自漢祖過魯之後多爲之立廟沿及唐宋英明願治之君屢作益尊而信之孔子之廟遂徧天下爵號王公禮視諸侯而加隆焉蓋天理民彝之在人不能自泯也我皇祖以至神大聖植綱常於淪斃之餘武功方戢卽遣人詣闕里祀孔子風示天下規度可謂宏遠矣列聖相傳益嚴祀事先後一軌暨我皇考憲宗詔增廟之舞佾爲八籩豆十二禮樂盡同於天子褒崇之典

至是蓋無以加我國家百有餘年之太平端有自哉闕里有廟建自前代規制尤盛弘治己未六月燬於火朕聞之惕然特勅山東巡撫巡按暨布政按察司官聚財庀工爲之重建越五年甲子正月工畢巡撫右都御史徐源巡按監察御史陳璘以其狀來上宏深壯麗視舊規有加朕懷乃慰旣遣內閣輔臣太子太保戶部尚書兼謹身殿大學士李東陽往告復具顛末爲文俾勒之廟用昭我祖宗以來尊師重道之意并繫之詩曰聖人之生天豈偶然命之大君俾贊化權二帝三王君焉克聖

繼天立極道形於政大化既洽至治斯成巍巍蕩蕩渾乎難名周政不綱道隨時墜孔子聖人而不得位乃稽羣聖乃定六經萬世之師於焉足徵自漢而下數千餘歲褒典代加有隆無替於皇我祖居正體元六經是師卓爾化原列聖相承先後一揆逮及朕躬思弘前軌廟貌載崇祀事孔禋經言典訓彌謹彌敦俗化治成日升川至斯道之光允垂萬世

臣按自黃初俾侯宗聖刻石始承制書乾封追贈太師樹碑亦奉勅旨累朝刊勒竝出儒臣撰述歷

宋金元但傳祥符一贊至明永樂成化弘治遂有御製三碑然而視草率由詞苑揮毫付之中書豈有

天藻宸翰雙輝交美肇自亘古實惟

今日

皇上德躋極天之峻道造逢原之深既博於文復游於藝

紫極幾暇

黃屋務閒纂堯湯之典誥追羲昊之圖書孔思周情日新富有而於廟碑

親撰親書發天地之大文兼古今之至美自有

聖廟以來所未觀也而且鑿名山之翠珉陶上方之

碧瓦既發

內府之金重

遣皇華之使周爰咨度倂來以圖曰止日時可規可矩

乃經始於寅夏爰落成於卯秋碑既屹立亭斯穹

蓋制作大備如睹赤虹黃玉之文苗裔永存匪同

白馬丹書之誓紫微懸映軼賜札之十行金薤琳

瑯異寫經之三體爾乃翼凌雲之傑構靈光遜其

巋然承應宿之高費景福慚於竝峙軒車塞路但

有拜瞻鉛槧徒懷無能仰頌者矣

康熙二十六年丁卯五月十五日廣儲司員外郎

阜保恭齋到

御製

御書

周公孟子廟碑文仍同工部都水司員外郎卞永式

監造

先是山東巡撫張鵬

題為曠典一時竝舉孟廟亦應修葺謹一并

題明恭請

龍章以垂不朽事該臣准到部咨周公廟宇交與該撫設法修葺等語臣有請者堯舜禹湯文武之道成於周公集於孔子百餘年後百家爭鳴聖教幾熄賴一人焉起而正之者實惟孟子其著書七篇包羅天地揆敘萬類故歷代尊之為亞聖者以其大有功於聖教也臣考孟子廟建自宋景祐四年歷代皆加修葺今則牆垣倒塌殿宇傾圮棲石像於小屋仆斷碑於空庭因思

皇上闡明道脈遠紹心傳孔子周公二聖之典禮既崇則亞聖之廟貌宜肅臣等幸際昌時敢不仰體

聖心設法修葺以襄

盛典擬與周公廟一併鳩工但扁額碑記非

御製宸章無以永垂萬世伏冀

皇上親撰頒賜勒之貞珉奕禩取法無窮聖賢光被不

朽奉

旨該部議奏

禮部

題前事仰惟

皇上天縱聖明勤學稽古紹唐虞之道統闡孔孟之心

傳表章六經垂教萬世崇尚德報功之典弘承先

啓後之模

天章與雲漢同昭
宸翰偕日星竝麗今孟廟旣稱修葺允宜
御製扁額碑記永垂不朽俟

命下之日交與翰林院將

御製扁額碑記發出行文該撫製造懸掛刊勒可也奉
旨依議

附錄○古鄒城在今縣東南二十五里嶧山之陽
水經注曰嶧周圍二十里高秀特出積石相臨殆
無土壤石間多孔穴洞達相通有如數間屋甚奇

觀也由山而北羣山絡繹直接四基馬鞍二山而
九龍山之旁有大澤曰溪湖袤廣數里流爲白馬
湖西南以達於泗水湖之西孟母泉出焉孟子舊
居在此今子孫世居之○宋仁宗景祐四年孔道
輔守兗州求孟子墓於四基山得之始就山建廟
泰山孫復記曰龍圖孔公爲東魯之二年公聖人
之後以興復斯文爲已任謂諸儒之大有功聖門
者莫先於孟子吾當訪其墓而表之新其祠而祀
之以旌其烈於是符下俾鄒之官吏博求之果於
邑之東北三十里有山曰四基得其墓焉遂去榛

莽肇其堂宇以公孫丑萬章之徒配。宋神宗元豐六年封孟子爲鄒國公下制曰自孔子沒先王之道不明發揮微言以紹三聖功歸孟氏萬世所宗厥惟舊邦實有祠宇追加爵號以示褒崇元豐七年始以孟子配享孔廟。元文宗至順二年九月加贈孟子爲鄒國亞聖公制曰孟子百世之師也方戰國之縱橫異端之克塞不有君子孰任斯文觀夫七篇之書倦倦乎致君澤民之心凜凜乎拔本塞源之論黜霸功而崇王道距詖行而放淫辭可謂有功聖門追配神禹者矣朕若稽聖學祇

服格言乃著新稱以彰渥典於戲誦詩書而尚友緬懷鄒魯之風非仁義則不陳期底唐虞之治英風千載蔚有耿光可加封鄒國亞聖公。宋徽宗宣和四年縣尹朱在始徙廟於南門外道左孫傳記畧曰孟子葬鄒之四基山傍塚爲廟歲久弗治廟距城三十餘里先是嘗別營廟於邑之東郭以便禮謁元豐七年詔更新廟貌而地頗湫隘宣和三年縣令朱在謀諸邑人諸生成謂廟瀕水亟壞不四十年比五更修矣若許改卜爽塏之地則願任其事令許之遂徙廟於邑。明孝宗弘治九年

修復孟廟至熹宗天啓二年白蓮聞香妖黨突起
盤據鄒滕者半載孟廟及中庸書院斷機諸祠悉
罹兵燹一切廟廡垣墉無不殘毀賊平究守孫朝
肅修復之大學士文震孟爲之記○鄒縣治東舊
有子思講堂相傳思孟授受於此元成宗元貞間
縣尹司居敬以縣東南隅暴書臺處世傳爲孟子
故宅因建子思祠於暴書臺東榜曰中庸精舍堂
曰淵源實爲書院之始張頌記曰鄒人相傳孟子
故宅在縣東南隅其宅前臨因利溝南揖文賢岡
泗川掩抱好事者築暴書臺其間則昔日故有廬

舍又縣治東隙地舊名子思講堂謂孟子傳道於
此受學故當在魯豈子思時至鄒耶今千六百餘
年邑人猶曰此故宅此講堂洞洞屬屬如將見之
可不因人心所向以存其蹟乎東陽司居敬來尹
茲邑復故宅遺蹟闢門修垣以表之寄講堂於暴
書臺旁名曰中庸精舍子思子南面孟子西向侍
皆章甫元端危坐儼然昔日授受之容矣○司尹
旣去縣尹宋彭繼之始建講堂於淵源堂之後曰
率性堂又爲學官居室於其左齋舍厨庫翼爲東
西請於朝總名爲中庸書院時成宗大德六年也

○元仁宗延祐二年詔改中庸書院額爲子思書院設山長以司祭祀及教事。文宗至順二年封子思爲沂國述聖公。明武宗正德元年以衍聖公次子襲封翰林院五經博士一員奉子思書院廟事

臣按宋神宗元豐六年朝散大夫吏部尚書曾孝寬上言孟軻氏自古常以其書置博士朝廷亦以其書勸學取士而未有封爵載於祀典章下禮官禮官言孟子傳聖人之道有功天下後世今若止加廟額侯爵恐未盡褒崇檢會顏子封兗國公十

哲益封郡公欲乞自朝省詳酌特封公爵以示褒顯天子從之封鄒國公七年以孟子配享孔子度宗咸淳三年升曾子子思子竝配孔子位在孟子上初高孝間洪邁嘗謂孟子配食與顏子竝而其師子思子思之師曾子皆在其下於禮儀實爲未然至是始以四子竝配此封爵配饗之原始也元祐間龍圖閣學士孔道輔守兗州求孟子墓於四基山就墓旁立廟元豐七年知兗州軍事李旻請曰孟子廟在鄒鎮東北隅制度極陋下仙源縣勘會有室七間皆已倒塌請於修文宣王廟剩錢內

支錢三百貫增修孟子廟以稱今來爵命朝議從之考鄒自熙寧五年地入仙源此時廟猶在墓前至後復爲縣別營廟於邑之東郭而今南門外之廟則徽宗宣和四年所移置此祠廟更置之本末也子思子中庸書院與孟母斷機堂則肇造於元鄒尹司居敬夫鄒魯授受之迹迥不可追而講堂故址於一千六百餘年之後人咸稱述弗忘於斯見大道之不泯於人心而守先待後聞風興起之說驗矣究守表祠墓於前鄒尹修書院於後桑梓敬止几杖儼然二賢之功其可忘乎二千餘年後

幸遇我

皇上秉

大聖之制作明斯道之淵源推之孔子之前之後而周孟二碑同時竝建鄒魯之邦

御碑鼎峙如日月之竝行五星之齊耀風聲所樹已足振起愚蒙漸被九有矧

錫之敷言發皇震動凡厥庶民靡不是訓是行以近天子之光者矣

康熙三十五年丙子六月國子監祭酒孫岳頌司業張豫章疏請

皇上以三次

親征勦滅噶爾丹朔漠永清告捷

聖廟且請紀

聖德神功

御製

御書碑文勒石國學

頒示天下

命禮臣議議上

制曰可

遣大學士張玉書祭告

聖廟翰林院侍讀學士史夔祭告

闕里 文載第一卷

禮部

題為

聖算無遺

天威遠震凱旋振旅邊徼永清請酌古制告捷學宮事

禮科抄出國子監祭酒孫岳頌司業張豫章題前

事內稱竊惟自古聖帝明王為國計民生謀久安

長治則有負固逆命者必命將出師恭行天討殲

厥醜類以奠安中外然或近在封域之間非盡遠

三傳五典 卷十四
三
踰邊庭之界即使躬親韎韐亦必歲久成功故漢之武帝唐之太宗未嘗不開疆拓宇而不能迅奏膚功明之成祖亦屢出塞征討地猶未遠不寧惟是殷高宗之克鬼方也以三年周宣王六月興師以伐玁狁亦僅至於太原而已未有親統大軍出險涉遠不數十日而大功告成廓清沙漠又安邊境如我

皇上之神武首出復邁百王者也我

皇上自御極以來削平三逆掃蕩臺灣南朔東西竝奉正朔凡戴髮含齒之儔咸思向風而效順乃有厄

魯特噶爾丹者辜恩背德獨自外於聲教狡謀出沒擾亂邊陲逆天虐民罪在不赦

皇上念逆寇一日不靖則邊氓一日不安非速行勦滅曷由共享太平雖諸王大臣請緩

親征而

睿謀獨斷衆論不撓且軍儲皆出

天庾轉餉數十萬石時

頒賞賚師有餘資總以安四海生靈之命綿

宗社無疆之庥故不憚

六飛遠邁身先士卒而天人叶應自誓師以迄大捷僅

七十日耳從此邊塞不聞金鼓之聲斥埃永無烽
火之警胥游化日共樂堯天是從來未有之大仁
也師出之日水凍草枯及

御蹕經臨掘地則泉湧牧馬則草肥蓋天時地脈已早
決於

宸算之中非臣下所能測識萬一且分布諸軍爲三路
調度規畫竝出

皇上之指授噶爾丹旣凜

天威之降臨復聞大軍之四繞釜炊不及餐妻孥不暇
顧棄而宵遁自謂可以免脫不知

神策秘謨預定於前逆寇西奔

天戈東指諸軍會合環而擊之背水阻山擒斬殆盡餘
黨星散絡繹就降子女牛羊俘獲無算搗其巢穴
沙磧一空是從來未有之大智也巴顏烏喇黑魯
倫河等地最爲險遠行間持戟尚憚馳驅乃

皇上親舉玉趾櫛風沐雨日進一餐勞苦與軍士共之
聖恩率數十萬貔貅之衆踰天山渡瀚海如履平地而
星上走康莊莫不忠義激發驍騰百倍兵刃未接先已
披靡乘勝窮追摧枯拉朽逆寇旣就滅亡塞外諸
藩益復畏威懷德是從來未有之大勇也十五日

午門宣捷二十三日又

午門宣捷跪聽嵩呼誠懽誠忭凡屬臣民舉翹首

皇上回鑾告成功以彰顯烈臣等一介腐儒荷蒙

聖恩簡擢不獲負弩執戈効力塞外伏查禮記王制曰

天子出征執有罪反釋奠於學以訊馘告即魯頌

泮水之詩亦曰矯矯虎臣在泮獻馘淑問如臯陶

在泮獻囚是三代時告捷於學也漢唐以來僅於

丹鳳樓前及午門外受俘未有告成於國學者似

於詩禮爲未符

皇上建千古未有之功則漢唐未舉行之盛事請自

皇上始之即

聖朝寬仁不必有事於訊馘而專行釋奠之禮昭告

文廟勒石太學原本六經非由臆說不妨與祭告闕

里竝行將見文德武功益光昭史冊於無旣矣臣

等愚鈍無知遭際

聖明謹據經生之見仰塵

天聽因係條陳事宜字多踰格如果臣言可採伏祈

勅部議覆施行康熙三十五年六月二十五日題七月

初四日奉

旨該部議奏欽此欽遵於本月初五日到部該臣等議

得國子監祭酒孫岳頒司業張豫章疏稱我

皇上自御極以來削平三逆掃蕩臺灣凡戴髮含齒之
儔咸思向風而效順乃有厄魯特噶爾丹者辜恩
背德逆天虐民罪在不赦

皇上念逆寇一日不靖則邊氓一日不安故不憚

六飛遠邁身先士卒而天人叶應自誓師以迄大捷僅
七十日耳師出之日水凍草枯及

御蹕經臨掘地則泉湧牧馬則草肥蓋天時地脈已早

決於

宸算之中非臣下所能測識萬一噶爾丹釜炊不及餐

妻孥不暇顧棄而宵遁自謂可以免脫不知

神策秘謨預定於前諸軍會合環而擊之餘黨星散絡
繹就降子女牛羊俘獲無算搗其巢穴沙磧一空
逆寇既就滅亡塞外諸藩益復畏威懷德

午門宣捷跪聽嵩呼誠懽誠忭凡屬臣民舉翹首

皇上回鑾告成功以彰顯烈伏查禮記王制曰天子出
征執有罪反釋奠於學以訊讖告即魯頌泮水之
詩亦曰矯矯虎臣在泮獻馘淑問如臯陶在泮獻
囚是三代時皆告捷於學也

皇上建千古未有之功則漢唐未舉行之盛事請自

皇上始之即

聖朝寬仁不必有事於訊馘而專行釋奠之禮昭告

文廟勒石太學原本六經非由臆說不妨與祭告關

里竝行將見文德武功益光昭史冊於無既等因

前來查祭告關里臣部以

聖謨廣運等事一疏請

旨俟

命下舉行外其祭酒孫岳頌等所請不必有事訊馘專

行釋奠之禮查康熙八年四月內

皇上親詣太學舉行釋奠在案仰惟我

皇上親統六師將噶爾丹刻期勦滅武功既盛文德益

彰應

遣大臣一員詣

文廟祭告成功自

皇上徂征以至

回鑾一切

訐謨勝算及將士之踴躍百神之効靈允宜纂集大綱

進呈

御覽勒石國學更將碑文摹搨頒發各直省總督巡撫

轉發各府州縣學俾萬代士子咸知

皇上遠踰瀚海迴出絕域屏去幃幄晝夜躬擐甲胄身先士卒

聖武神謀殄滅逆寇創此開闢以來未有之盛烈也恭候

命下虔辦祭品選擇吉日

遣大臣之處由太常寺衙門啓

奏其告祭祭文勒石碑文由翰林院撰擬呈

覽其碑石由工部備辦勒石之處交與國子監刊刻俟

勒成之日摹榻轉送臣部頒發直省可也臣等未

敢擅便謹題請

旨康熙三十五年七月十五日題三十六年六月初六

日奉

旨依議

附錄。詩魯頌泮宮曰矯矯虎臣在泮獻馘淑問

如臯陶在泮獻囚毛公傳曰囚拘也鄭康成箋云

馘取格者之左耳囚所虜獲者僖公既伐淮而反

在泮宮使武臣獻馘又使善獄之吏獻囚孔穎達

正義曰釋詁云馘獲也皇矣傳曰殺而獻其左耳

故云馘所獲者之左耳謂臨陣格殺之而取其左

耳也囚所虜獲者謂生執而係虜之則所謂執訊

者也。禮記王制曰天子將出征類乎上帝宜乎社造乎禰禡於所征之地受命於祖受成於學出征執有罪反釋奠於學以訊馘告鄭氏於受成於學註曰定其謀也釋菜於學二句註曰釋菜奠幣禮先師也訊馘取生獲斷耳者孔穎達正義曰受成於學者謂在學謀議兵事好惡可否其謀成定受此成定之謀於學裏故云受成於學。出征執有罪者謂出師征伐執此有罪之人還反而歸釋菜奠幣在於學以可言問之訊馘左耳之馘告先聖先師也。又曰案周禮宗伯師還獻愷于祖司

馬職云愷樂獻于社此記不云祖及社者文不具周禮不云獻愷於學者亦文不具

臣按猾夏之吞征苗之役見於虞書鬼方之伐垂於易象猳狁于襄昆夷之喙荆舒之懲撻伐之績著於雅頌自古聖帝明王盛德大業昭垂經籍者曷常不以攘外安內爲亟亟哉然率由命將徂征未聞親臨絕域亦且積有歲月然後克之不過驅之遠遁受其歸欵未聞盡其種類殄滅無遺者至於獨斷之決料敵之明成功之速戰必勝攻必取俘其子息殲厥渠魁一勞永逸而且心切好生恩

敷竝育受數百萬之降闢數萬里之地則自五帝三王以來未有如我

皇上親征之役功最高德最厚者也伏稽釋奠於學以訊馘告之文載在王制獻囚獻馘魯頌歌之典綦鉅矣而三代以下未有行之者豈惟古禮久湮罕能修舉良由後世帝王功烈卑淺不足以稱此隆儀也幸遇

聖朝躬行此禮詎非超越萬古之盛事哉吾夫子自言以戰則克而春秋之作尤謹內外之防然則皇上之天威遠震建此大功與

先聖之心若合符節固有默契焉者匪獨聲靈之赫濯而已也臣等跽伏東魯俯慚懦懦不能執殳屬韃効力疆場親見

聖天子廟謨之神妙功業之崇隆第伏讀諸臣恭賀大捷之疏懼忭踴躍不能自禁念自

先聖立廟學宮以來數千餘年乃得覲茲曠典洵屬萬世未有之遭逢且仰見我

皇上文德武功事事皆傳

聖人之心法上邁唐虞三代之隆而

奎章

宸翰亦且與典謨雅頌照耀兩間乾坤俱永矣

聖人之功於世也遠矣三代之所由


皇王文辭及於世者皆由

聖典與國詩書禮記春秋之類豈凡庸可與

夫聖立國學宮以承襲千倉乎代孫傳茲

人財之盛於世也豈非自聖德之

之無效也聖之崇教養分屬諸君恭贊



幸魯盛典卷十四終

前所不獲其法者則論精靈之精

